

四庫全書

集部

欽定四庫全書

伊濱集卷五

元 王沂 撰

七言古詩

妬女祠

關頭妬女祠，古屋高亭亭。  
靚粧炫服過其下，往往霹靂來青冥。  
翠鬟鬱隱隱，玉佩泉泠泠。  
曉月吐粧鏡，晚風羅畫屏。  
與誰同躡鳳凰去，玉宇瑤堦常不扃。  
人間歲月如流電，迴頭試望昭陽殿。  
爭妍固寵幾多時，飛燕婕妤俱

不見

題趙子昂畫馬

龍媒來自月窟西誰其牽者虬髯奚雙瞳紫焰竹批耳  
一團黑雲錐卓蹄吳興學士畫無比筆迹遠過龍眠李  
雄姿不受絡頭絲滿紙蕭蕭朔風起公今騎鯨去滅沒  
世上有誰憐駿骨安得幽并豪俠相往還短衣射獵藍  
田山

月堂為賀醫賦

賀生早飲上池水心如秋空絕塵滓  
紫蓋峰南結屋居囊中探丸起人死  
長安市上識韓康宴坐歸來月滿堂  
江上誰能聽瑤瑟山中應許得金漿

雞嘆

清晨有雞步庭除朱冠蒼距秀尾舒  
投粟不啄鳴向余豈欲臆對如鵬乎  
我生羽族五德俱風雨如晦而不渝  
警君貪眠旦讀書胡為以我充庖厨  
我生曾不餓鴟如奪攘不愧為人驅  
填腸滿嗉誇自呼摩空唐突羲和鳥

彼不彈射我是圖我獨何辜君何愚

題劉彥昭杏林春曉圖

閒看杏林蔓柯條每到春晴花最嬌  
彩雲終日淨如拭絳雪有時吹未銷  
檢方清潤浮書度接席繁陰落酒瓢  
舊遊回首已十載杏實纍纍須見招

汧陽驛

山迴江轉流百折山翠蕩摩江色淨  
羣飛野燕低掠水獨立晴鷗閒顧影  
居人十九癭纍纍見客何曾羞掩領

鄉音巴蜀雜咸秦而我聞之不能省

送武秀才還湖廣

衡岳之峰七十二祝融特起摩青冥連巒疊嶂妬奇秀  
盤屈怒作蛟蛇形噓雲吐霧埋不得空翠飛飛落洞庭  
武生家居洞庭上湖水為沼山為屏橘洲種樹等千戶  
石鼓讀書窮六經焚香白晝鸞鶴下鼓瑟清夜魚龍聽  
一朝結束催客丁思與衆人朝滄溟含毫擬獻上林賦  
置醴亦厭侯門鯖東華塵土紅撲帽夢寐汀洲蘭芷馨

腐儒老眼千年青遙看南極老人星  
安得酒舫載酒行  
長與酒徒共醉醒

車麟麟

車麟麟易水濱恩澤侯竄南州南州迢迢千里道雄虺  
呼風搖毒草朝盤蜜唧暮鵲鷗瘴霧著人人易老昔  
日朱門炙手熱金紫童僕姬姜妾烹羊炮羔易折葵墮珥  
遺珠輕掃葉一朝旤起蹈危機上蔡無由黃犬歸金籠  
鸚鵡喚新主畫閣美人猶故衣故衣空憐香未滅宵信

繁華有消歇君不見湘江斑竹有餘痕竹上斑斑竟誰  
血

題李遵道枯木

孤根偃蹇蟠厚地廉蔭千年有生氣叢篁瀟灑勢拂雲  
王謝諸子超人羣李侯筆端妙如此坐我小山烟雨裏  
安得天風來萬里仙槎快泛銀河水

送上清張叔大鍊師東還

芒碭王氣浮天關真人乃在圮橋間功成往事赤松子



心與浮雲如等閒上清億劫元教起坐引諸天黍珠裏  
昨聞仙子御風來身著山中紫霞綺東海塵飛二十年  
仙凡消息兩茫然守關暗識青牛去渡海春逢白鶴傳  
五陵八百遺仙記思欲攀天問天帝三尺青萍手可提  
一品銀章肘先繫笑把芙蓉花相期訪蓬島不見河上  
公空懷橘中老大明治世龍漢秋條來條往應難留月明  
後夜碧天淨笙鶴送爾緱山頭

太古樓為余鍊師賦

道人鍊質同蟬蛻回頭甲子馬能計曾見彭聃嬰孺時  
解記軒轅以前事願憑黃鶴寄短書借我縹緲之仙居  
安得霞飡野服長健八千歲著書細說天年初

虎牢關

孤雲兩角如劃布中有長天懸足素關頭一上眼豁開  
漢殿秦宮皆可數太行之青遺塊小下視黃流一絲裊  
乾坤勝槩無古今一笑英雄如過鳥長謠我欲問真宰  
世事茫茫幾成敗君不見三分書裏說虎牢曾使戰骨

如山高

老胡賣藥歌

西城賈胡年八十一生技能人不及神農百草舊知名  
久客江南是鄉邑朝來街北暮街東聞擲銅鈴競來集  
居人相見眼終青不似當時答朮丁師心已解工名術  
療病何煩說難經江南只今成樂土異代繁華復親覩  
全家妻子得安居篋裏青蚨夜還數燈前酌酒醉婆娑  
痼疾疲瘥易得瘥金絲膏藥熬較好傷折近來人苦多

川船南通有新藥海上奇方效如昨眼中萬事不足論  
流寓無如賈胡樂

題李後主畫山人騎牛圖

君不學嵩山劉屯田鐵笛牛背吹雲烟又不學廬山陳  
處士目送飛鴻坐牛背問君胡為偃蹇牛背眠結草為  
轡蓑為韉山童抱琴走如鹿溪溜沒膝衣鶉懸南唐天  
子畫無比深宮畫長雲夢水揮毫寫出逸人容清標照  
耀澄心紙期人太淺陋相如妄謂山澤儒皆臞安知有

道樓草野食雖不玉顏長朱繁華已逐西風盡空餘建  
業文房印淒涼天水柳枝龍白鴈江頭又霜信

發福昌望女儿山弔辛敬之

竹鷄喚雨催遊人提壺勸客意最真連昌宮中一杯酒  
不負落花啼鳥春東風忽來吹女儿翠縷參差為誰起  
不見能詩辛老子辛與老饑相抗元清時亦有郊島窮  
况乃天地兵塵中書生糠粃苦不足朱門蒼頭飽粱肉

李子實八十

李翁眼碧眉紫烟見者疑是商山仙庭前花發三荆滿  
膝下衣裁五色鮮畦蔬可茹泉可釀冠蓋時時問無恙  
青鞋野服步履輕不要漢家靈壽杖

題古愚遠碧樓

峴山鱗鱗翠初洗勢若濤瀾低復起秋高水落衆峰出  
野曠烟消數鬟委嵐光分流與尊酒秀色浮空來席几  
先生久厭承明廬晚歲重紬金匱史肩輿不復用門生  
結屋于茲有兒子駟馬歸來延福里倚闌琢詩萬事理

溪流可釀為翁壽絕勝南陽菊潭水

春江釣者

白鷺洲頭春水生青山倒影碧波明閒門却掃流塵靜  
深樹似聞啼鳥聲漁舟蕩漾持竿久世事茫茫不回首  
釣得金鱗換酒歸夕陽正照垂楊柳

周博士伯溫次韻見示和以答之

硯紋女髮綠新洗硯質女膚滑凝水海犀壓紙風不起  
妙語縱橫能泣鬼子官中秘覽羣玉古意清風如可掬

畫闌鹿眠香草軟繡簾燕掠飛花感經惟舊講思無邪  
裏蹠新鑄丹穴砂好陳聖主賢臣頌莫讓淵雲來漢家  
老夫南望江上屋只有歸田賦堪續買舟留詩供一笑  
有人定憶顏光祿

琯玉盤螭歌

我有雙盤螭文藻光陸離自非蟾肪昆吾刀琯法精妙  
曷以為世無李伯時解作洗玉池又無呂與叔能辨璜  
與璩貫之雙帶祇自奇豈惟比德古君子亦可借題君



王詩

別外窩禪寺

四山如城勢如束一徑蜿蜒入穹谷  
林端縹緲浮斷香知有招提映深竹  
山僧見客若麋鹿揭炬夜開方丈屋  
談空煮茗欲忘眠月轉金盆掛喬木  
朝來鐘磬亦多情餘音送我遠益清  
自憐踈拙招物議敢厭瑩确疲山行  
青山勸汝一杯酒問我他年更來否

送項可立歸養天台

林鳥返哺朝陽枝倚門手取連環持木奴青黃屋角垂  
遊子心驚懷橘時有親七十世上稀況君抱得明珠歸  
斑衣兒啼真樂在擁笏垂魚徒爾為愛君德器溫且厚  
藍田烟霧生瓊玖安得赤城瀑布變春酒為太夫人千  
歲壽

燒山

羣峰我我錯鯨齒頑寒顛顛水脫指嚙颺折樹怒未已  
黑雲壓山山火起初疑夜過古戰場走燐出沒秋草黃

又疑兵散井陘野萬馬赤幟隨低昂條如斜陽下喬木  
江浦漁燈相斷續諸姨紅袖照驪山齊奴錦帳圍金谷  
長烟遙遙橫楚氛怒焰烈烈奔吳軍炎官播弄水妃怒  
九輪照燭乾坤焚窮蛇上木不遺力驚鵲穿雲勢何急  
熊羆相弔獵夫喜桐梓哀鳴山鬼泣紛紛飛燼隨西風  
回首咸陽三月紅怪同燃犀弔牛渚快若照燕焚吳宮  
陸渾仙去文章伯千載風流冷如鐵怪詞險韻吾未能  
物色分留愧逋客

蜀禽

林端錦鳩鳴逐婦林下竹鷄啼喚雨遠認丁丁啄木聲  
近愛闌闌栗留語提壺只解自獻酬畫眉雖工誰媚嫵  
何年失國號郭公何帝遺魄為杜宇姑惡怨出誰氏夫  
婆餅憂焦誰氏女夏雞侵曉促耕夫山狗臨昏警行旅  
惜無柘彈落鷓鴣恨不雕籠貯鸚鵡山鴉澤雉雜羣鵲  
百族喧啾誰復數林棲澗飲性各適雄飛雌從了朝暮  
豈惟清美巧音聲亦復爛斑好毛羽老夫萬里蜀道歸

馬上新修蜀禽譜

泥滑滑

泥滑滑山鳥啼馬蕭蕭人未歸  
聲聲喚起風和雨高柳  
畫橋西去路回頭勿憶去年時  
老盡行人路如故

送春詞

黃金臺下東西道紫燕矜誇金勒好  
長溝漾情情不盡  
碧草迷人人易老樓上迎春又送春  
邯鄲兒女嬌翠頻  
一聲鶉鴉鳳城曙滿眼芳洲生白蘋  
柔桑繞舍麥如尾

錦雉將雛梅結子為問歸耕江上田何如但索長安米

澆石硯

天孫染雲綠初洗剛風吹落熙河水龍工呵護睡不起  
探領適遭西域鬼昆吾寶刀利切玉秀色可食潤可掬  
隋宮百斛分黛螺何似文君一嘯戲侑之黃金古辟邪  
土痕隱隱凝丹砂那知建業文房物流落灤江好事家  
翰林夜半光射屋廣大高詞韻莫續校讎喚取劉更生  
定有青藜照天祿

白翎雀

白翎雀龍沙漫漫生處樂醒鬆共愛語言好璀璨誰憐  
羽毛薄霜威稜稜風力緊飛飛不過槍竿嶺結巢生子  
草棘間雌雄相依寒並影梨園弟子番曲譜歲歲年年  
兩京路慣聞清哢雜好音旋理冰弦移鴈柱寫出新聲  
玉指勞真珠落盤鈴撼條坐令華筵之四壁灤河流急  
秋雲高從此流傳喧樂府爭買千金比鸚鵡雕籠雖好  
無常主時向北風念疇侶

又詞

烏桓城邊春草薄  
草際飛鳴白翎雀  
年年馬上聽好音  
疑是羶車響絃索  
南風吹雲沙磧涼  
飛塵不到紫游韁  
芙蓉金照晴川迥  
芍藥紅翻灤水香  
灤江已過猶回首  
華堂美人將進酒  
酒酣忽作馬上聽  
紅蓮袖插曹剛手  
廬陵解先生之子  
子元見示詩卷因次韻

交遊聚散如團沙  
忍使白壁生微瑕  
賓鴻自顧好儔侶  
猛虎莫恃雄鬚牙  
乃翁臯比坐談道  
根極理要遺浮葩



泮宮要看富芹藻茅屋未許隣烟霞賢郎早歲事著述  
經學奧妙窺永嘉娛親自有筆五色長身鵠立衣猶麻  
天門九重見明主彤庭左右皆驚嗟京華旅食厭葱韭  
江國歸思多魚鰕垂天佇化北溟翼老圃莫種東陵瓜  
他年懷綬拜家慶小窗夜雨燈先花

送紫虛道人

紫虛道人羽為裳骨如削石瞳碧光鳳凰城裏秋風起  
龍虎山中瑤草長燕齊方士皆與友賣藥得錢即沽酒

手持青竹或成龍自種靈苗時化狗飄然忽賦太山吟  
南望白雲深復深坐令京洛塵土底似聽石泉風雨音  
問君胡為樂枯槁富貴輕塵棲弱草世人如鹿死無魂  
安知海上如瓜棗

高空山人

高空之山多仙靈山泉可釀田可耕烟消日出紫翠橫  
彷彿羽蓋揚霓旌高空山人世簪纓玉壺滿貯冰雪清  
風流不減謝內史翰墨欲壓山元卿今年七十髮未白

胃中梨棗裁已成焚香永晝鸞鶴下橫笛清夜蛟龍驚  
碧蓮供吸酒過客或騎鯨便令呼麻姑共謁王方平握  
手一笑三千齡撫頂何勞授長生

壬寅紀異同劉以和賦

壬寅仲春天雨雹南平城中盡驚愕初從屋瓦亂奔騰  
散入階除更跳躍兒童不識挽衣盛兩兩相看恣相謔  
老來閱歷憂患餘却顧兒童淚雙落春秋咎徵不一書  
茲事班班宛如昨自從兵革十年來瀕洞風塵亘沙漠

奮當車轍小物為天理何嘗省元惡竊聞李郭收西京  
元氣依然萃光岳旄頭夜夜繁中天風虎雲龍聖人作  
嗚呼風虎雲龍聖人作吾徒勿憂在溝壑

房公湖

房公昔年為刺史日日湖邊看湖水琴中不識董庭蘭  
觀過亦足知君子漢州修竹綠如雲落落落相看有此君  
兒曹謗傷等蟬沸逸氣自是超人羣我行金鴈橋西路  
綠樹啼鵲怨春暮郇筒拍拍貯鵝黃一酌房公舊遊處

題明皇幸蜀圖

華清朝披霓裳舞日晏漁陽動輦鼓潼關烽火照驪山  
玉輦西巡劍門路劍門崢嶸高切雲長安不見見烟塵  
嫣然一笑侍君側腸斷昭陽第一人巴雲冥冥上亭驛  
羽蓋低垂翠華濕鈴聲琅琅雨聲急宮嬪不眠內官泣  
君王起坐寫新聲明珠玉佩相和鳴鮫人綃梭夜停織  
山鬼倚樹愁天明弄兵祿兒帳下死神器潛移遽如此  
高將軍去侍臣稀往事欲言誰與理秦陵野草凝荒烟

蜀山春樹多啼鵲教坊花氏閱真譜惆悵側聲今不傳

由東綿虎坳至浪川望石人嶺阻雨留宿田家

臘月南薰吹度關我行始識東縣山篁牙連峰雜雲樹  
蔚若虎豹文采相班班奔湍噴壑雨外急惡鳥啼晝林  
之灣泥路滑滑傷旅顏晝移木坑始歇息午飯未已仍  
躋攀前登虎坳險有客壠上還息肩弛擔問鄉井更說  
前途方險難荷戈壯士揭竿南蠻當關守禦廼為國而  
我遠道蒲伏何時閒山風薄雲山雨惡石人嶺頭石鑿

鑿僕夫跬步不可以徑升下有豺狼上黃鶴豺狼攫人  
肉黃鶴翔寥廓我獨栖栖風雨中足繭荒村竟誰托田  
夫曉出夜未歸田婦呼兒慰牢落瓦盆酌酒酒數行藉  
草歌眠散腰脚山中雲重浮嵐寒身上濕衣猶未乾今  
人學古事干謁歲宴先歌行路難

欽定四庫全書

伊濱集卷六

元 王沂 撰

五言律詩

試院中聞簾官張雄飛賦詩甚多分題得春草  
賦送孟功郎中使淮南

二月青門道玉驄驕不行和烟迷上苑隨水遶蕪城目  
極傷離別情多管送迎相思定相寄佳句夢中成

馮氏藏書堂



蕭條門巷靜時有客停輪所得寧湏計相過莫厭頻芸  
香清辟潤書帶細搖春自笑揚雄僻誰云郭劇貧

送袁達道

諸生都養久列郡用才先白髮占烏鵲清江照畫船東  
陽好山水憲府富英賢慎爾持冰蘖還應力薦延

送范悅古

燕市多奇俊歸心獨浩然朱雲辭吏日賈誼上書年春  
綠蘆溝草江回楚客船知才不能薦敢恨坐無氊

送苗天澤

從師古云樂話別意何如司馬雖工賦兒寬本受書涼  
風下黃葉秋水媚紅蕖燈火橋門夜新詩定起予

送符生

遊子三年別雙親八十稀好風催畫鷁春水照斑衣長  
樂鐘聲斷蘆溝樹影微我無懷橘日空望白雲飛

送揭理

京華為客久不是賞音稀書未投光範詩先賦式微涼

風驚畫扇江水照斑衣莫道行裝薄驪珠滿袖歸

賦風

靜追蘋末興況復值蕭條猛勢資新鴈寒威伴暮潮過  
山雲散亂經樹葉飄飄今日烟江上征帆望望遙

題蘇伯修春風亭

退食青瑣闥委蛇嘉樹林如何試春服還此集華簪庭  
草皆生意園禽自好音寥寥千載上俛仰會余心

月庭為孫伯昭賦

朝出塵如霧歸來月滿庭名高三語掾食厭五侯鯖碧  
漢雲歸淨金莖露未零壯懷銷鑠盡偏照髮星星

生日次楊自樗姑夫

無限劬勞感潜然涕泗零桑弧今在戶萊服舊趨庭齒  
豁榮何益家貧險盡經徒存心耿耿有愧鬢星星

挽蕭處士遠心

江左衣冠族家傳復過庭城空新化鶴窓冷舊囊螢西  
漢儒林傳南州處士星階前蘭玉滿衮衮繼芳馨

挽王端卿處士

風吹隨流水鳥衣自夕陽  
窓前書帶草林下德星堂  
編簡尋真味  
品花散古香  
淒涼鎮山路  
松柏暮蒼蒼

除夕

沙路燈成市  
衡門雪擁籬  
茂陵新病後  
梁父獨吟時  
落浮波瓠  
傾輸向日葵  
不憂雙鬢改  
惟恨鈍如槌

過劒閣

危棧羊腸轉  
羣峰馬齒齋  
崇墉專地險  
足練覺天低  
俯

矚金牛北雄吞玉壘西連林青不斷留與子規啼

峽山次陳心吾

病酒知更早推蓬愛月亭千林動涼吹數葉下秋汀峽  
近深防虎沙昏亂照螢殊方思妙藥愁醉只長醒

仁齋為醫者郭成甫賦

燕處仁為表淳風坐挽還寶方懸肘後陰德見眉間焚  
券長安市求仙太白山文園消渴久歸思滿鄉關

送陳萬里之四明幕官

衆樂昔曾別蓬萊亦可求  
邦君能坐嘯幕府得名流  
溝港通魚市雲霞雜蜃樓  
因君一回首塵土滿貂裘

八十老人

鳩杖鹿為裳  
龐眉兩鬢霜  
鶴巢親種樹  
龜息舊支床  
自得安心法  
寧論却老方  
恩榮新賜帛  
大勝橘中藏

送僧觀外

龍去千山雨  
花開萬樹春  
幽禪端有味  
瘦影本無塵  
會見螺吞象  
方知獸有麟  
馬師瞞不得  
龐蘊語非真

題解馬焦縣尉詩卷

驛吏傳呼定驂騑顧主鳴牧羊憐卜式上疏笑梅生芻  
秣寧無法溫涼要適平誰分駑與駿騰踏入神京

廖子謙廣文席上次韻

城中九日過家釀報新開偶就陶公菊因同鄭老杯鷄  
肥綠黍熟鱸美及橙來莫賦停雲句應須踏月回

送簡西碧尹桃源

龍門登早歲鳬舄化今朝縣古仙源近城荒楚戍遙莎



廳移案牘葺屋半漁樵別後書頻寄清淮入兩潮

書事

暮三朝四裏乾啼濕哭中間爭腐鼠天外起冥鴻價  
重咸陽市名高稷下宮元經何日草寂寞笑揚雄

竹澗亭

聞說軒車過新亭醉墨存硬黃臨古帖空翠落清尊老  
節題詩遍春流洗硯渾烟霞興蕭散難與俗人言

題楓溪圖

秋色醉紅樹晴嵐蒸白雲何人事結構於此脫塵氛野  
屐破苔色輕橈生水紋仙源如可到鸞鶴定平分

書感

學荒虛度歲客遠苦思親未得平安報空驚物候新向  
來甘絕俗不是故違人好在牆根草青青又一春

嘉陵道中

蜀道朝逢雨蕭蕭意轉迷江沙留虎跡山木護猿啼古  
棧緣崖小陰雲傍水低春禽正堪聽莫惜錦障泥

旦日口占

朔日逢丁卯王正紀甲寅階莫天上早池草雪中春城  
郭回佳氣衣冠失舊人食貧甘守拙垂老遂為民

曉發

曉發槍竿嶺緣雲路杳茫驚飈振崑壑明月在衣裳擬  
欲超千載從茲覽八荒悠然晴景豁木葉滿山黃

題彭叔介負郭茅屋圖

負郭幽棲處林陰見草堂采樵躋鳥道垂釣踏魚航樹

擁山雲濕泉流石髓香亦知清景好來往未能忘

感興

古逕苔衣積晴窗竹影侵市聲塵午枕幽興寄雲林問  
字人攜酒敲門客抱琴急材聞聖世休效越人吟

送張掾之官河西

含香辭粉署躍馬過涼州野迴牛羊小天低帳幕稠清  
朝行召用雄鎮要分憂細酌蒲萄酒寧愁前路脩

遊東山

為愛東山好還思蜀道行玉裁筇竹杖雪縷芋魁羹會  
法參朶率遊仙夢玉京江波正西望况聽杜鵑聲

寄張順中四首

醉寫烏絲紙狂披紫綺裘時無李供奉誰識董糟邱月  
照清伊曉風生碧樹秋天津橋畔柳定拂酒家樓

薊北花先發周南草又青許身甘落後懷友惜飄零擬  
就窪尊飲重看布被銘只愁清潁水照見髮星星

金匱書成晚銅駝迹已迷憶同池上酌曾向壁間題仙

子能騎鶴山翁解祝鷄無才裨盛代有意學幽棲  
子住雒橋邊堂成祀十賢何由薦蘋藻每恨隔山川  
就蟠螭繫書憑過鴈傳伊流清見底誰覓孝廉船

蘭蕙圖

澤國多芳草叢生亦可憐餘馨留楚佩幽思入湘絃  
按譜雖同族為容各自妍灤河秋水濶疑問過江船

題霍山寓隱

長揖漢公卿携書隱澗垞朱雲堪作吏貢禹最明經  
書

報新來鶴囊乾舊聚螢相期高晚節不盡太行青

幽居

客思渾無賴開窓忽見山數峰青嶂出千里白雲還溪  
鳥恰飛起野花相對閒浮生百年內消得幾愁顏

同劉槎翁蕭朋起朋漢西華望月

雲散出西華秋清月色賒光涵珠斗淨影抱玉繩斜河  
迴槎孤汎崖陰樹半遮如何今夜裏星彩聚仙家

題嚴甥元齡松軒讀書圖

憶爾幽軒好耽書久未逢高科懷五桂喬木愛雙松流水池邊路浮雲戶外峰世家元不忝力學待昌宗

送推官之嘉禾

橋李民多訟君行總法曹南州雖地遠東海要門高霜橘明千樹仙禽唳九皋一麾容出守吾亦問吳舫

送黃汝舟推官高郵

高沙為郡遠城下客檣多笛弄揚州月珠游甓社波漁樵民易足雲水氣相和他日觀為政扁舟試一過



由東湖入都陽出大孤

艤棹轉東湖，流出大孤地方原。跨楚王業久興吳，山掩重瞳廟沙沉。八陣圖萬邦歸職貢，風化憶唐虞。

平潭驛中秋

晉國關河在秋風，禾黍成叢祠誰命。爵野鳥自呼名，又是中秋節。其如倦客情太行，今夜月還似去年明。

喜蝶

翳葉身如醉，迎風勢便狂。娟娟輕傅粉，栩栩暗偷香。橘

蠹忘前夢蛛絲闕後防殷勤收墜翼羣蟻為誰忙

送舒亦誠歸江南

碣石山中客青門道上歸  
泉甘供釀酒霞綺可裁衣  
迎棹慈鴉舞啣書白鶴飛  
回瞻丹鳳闕雲氣轉霏微

題太湖烟雨圖

垂虹亭上望烟樹辨三州  
悲嘯魚龍夜青黃橘柚秋  
水綃誰解寫畫鷁我曾游  
忽動南歸興同盟有白鷗

夜次荻港

泊舟臨荻港敗葉響蕭蕭汀鳥翔秋浦江豚落暮潮傍  
人漁未散吟伴酒初消因識將軍令轅門夜寂寥

滎陽郡夫人挽章

崇德瞻華表滎陽憶故侯名郎麟一角熟歲橘千頭萱  
草空華屋杯棬共此邱懷清高百尺鬱鬱見松楸

送遼陽學正歸覲

四望遼陽遠身疑化鶴仙向來文學掾今日孝廉船烏  
哺無窮意駒馳有限年夜闌更秉燭細說舊山川

送學錄永年

泮水集羣賢才華獨妙年定因文學掾為覓孝廉船能  
賦推王粲明經引服虔西風正搖落此別意茫然

旦日詠山茶

王氏鳴珂里山茶舊所栽花從新旦發根是昔年培綠  
潤疑雲度紅深愛日來春風故相惜歲歲長條枚

馬伏波廟

諸將中興日遺思獨在民壺頭憐晚歲椒壁誤功臣古

殿松陰冷空堦草色新雲臺圖畫好廟食更何人

秋懷四首

飄泊五秋螢無人問獨醒遙空孤鳥白平野數峰青望  
遠心猶壯懷人涕自零邱園他日事艱阻飽曾經

朝曦窺破牖寒鵲下空庭爽氣回青女清愁伴客星崢  
嶸喬木影寂寞晚花馨不似牆根草依然滿地青

入夜雨聲急開門落葉深風霜欺敗絮塵土暗孤琴飄  
泊嗟吾道艱虞識此心囚山成底事時得一閒吟

客子歸何晚，山城歲又窮。  
寒砧催短日，老木受高風。  
憂患身如寄，塵埃鬢欲蓬。  
江南天一角，回首羨飛鴻。

沙嶺

沙嶺千層出，羶車一字齊。  
馬嘶青苜蓿，人唱白銅鞮。  
野曠青烟直，天遙落日低。  
回看丹鳳闕，祇在五雲西。

送傅生還汶陽

塵土貂裘黑，關山木葉黃。  
秋風吹汶水，歸客問吳航。  
虎穴能無子，龍宮別有方。  
會看文學國，重舉孝廉郎。

小莊道中

客路千崖裏春風二月中虎蹄荒徑少鸞語故鄉同澗  
水縈迴綠山花自在紅物華空滿眼去意只匆匆

福州稅提舉張君挽章

小試征商日佳城忽馬前白雲空故國丹旆濕蠻烟旅  
櫬蛟螭護音容繪畫傳唐城東去路春草綠新阡

幽居次夏伯黃

歸來千里道寄寓百家村編竹通幽徑分葵藝小園農

談隣好密琴操土音存即事成今古相逢免雜言

送客

野水危橋缺荒榛古路通殘陽明樹杪孤客去山中啼  
鳥嬌秋浦落花飄晚風離愁雜清思悵望但忽忽

遊青原山次隆太古謝子方二首

送客淹螺浦尋僧問鷺峰水流通雪竇谷響雜霜鐘靈  
跡雙荆樹香風五鬣松追隨成信宿感爾意重重

躡雲來駐錫拓地此安禪曾讀傳燈錄因參不二天松



陰城四合雲影塔孤懸消歇同人世憑軒思惘然

徐安節挽詩

白髮歸來晚黃花入幾秋衣冠悲故國英俊憶同遊投  
轄苔生井歲書月滿樓漢濱耆舊傳準擬為君脩

李霽峰挽詩

夢覺義熙年歸耕海上田青雲子虛賦白首廣文壇故  
宅悲江令諸儒引服虔幽光發潛德妙語碧瑤鐫

題張仲舉贈桑文饒詩後

桑也有仙骨潛名醫藥中飢吟十日雨客夢幾秋風  
賴有酒堪飲初無文送窮好將青白眼留着送飛鴻  
賣藥韓康伯能詩張景陽世紛空落木句法挾秋霜  
杖履飛烟下聲名翰墨場往來成二老休負菊花黃  
青燈同雨夜貂帽共霜寒旅思寧無惡歸書但說安  
瑣林勞遠夢仙鶴養修翰聖代求才急終期拭目觀  
白石化羣羊仙家自有鄉草玄甘寂寂作賦問蒼蒼  
江路梅堪折山橋酒可嘗雙溪今夜月千里定相忘

人生逐羣動何路脫塵氛鸚鵡新題賦麒麟舊獻文頽  
垣猶擁雪怪石自生雲鳴鳥將春信殷勤報客聞  
世態浮雲變心源水鏡空時時書咄咄往往視夢夢磊  
落千年上汪洋萬折東梅花知我意的皦露椒紅

雜詩

寂歷踈花晚盤紆小逕連寒村明白水野寺起青烟三  
北非余恥一癡終自憐歸期何日是山月幾回圓

歲晚難為客地偏宜放慵城鴉驚戍鼓隣婦開村春木

落山排闥籬荒竹附庸不材甘懶散何去復何從  
曲曲高都路茫茫伊潁田雲低明去鴈野濶退飛鷺故  
國思千里君門隔九天窮途莫回首一望一悽然

題孝義詩卷

為惠非求報辭官只為親養松無觸鹿汲水有窮鱗潛  
德誰如子聞名願卜隣他年班馬筆汗簡表斯人

大孤山次鍾舉善韻

聞說揚瀾好舡更一灣江豚乘水上野鶴落雲間勝

景疑三島靈祠俯萬山若逢王子晉笙鶴定相攀

和王君寬暮春旅次詩韻

我欲留春住啼鶻苦勸歸捲簾看雨過倚杖數花飛  
烏几書堆滿衡門客到稀夢中江路香好在釣魚磯

心遠亭

物外青霞想山中白板扉有時捫蝨坐舉目送鴻飛  
自笑身將隱寧論世與違閒雲分半席誰道客來稀


又題心遠亭詩和孫老人韻先君視之曰花陰

不若易作花帷以對萍蓋為工蓋予初言花  
陰三面合故也鄉邦盜賊徧野傍城邱墟回  
想心遠何勝悵然

步履西郊曲幽懷得暫攄花帷三面合萍蓋一竿餘意  
悟前修近言忘世味疏不須厭塵事塵事亦無如

送河東教授

聞說河東縣絃歌比屋聞路經榆次驛山隔太行雲玉  
署閒憐我新詩寫送君灤河烟草綠離思亂紛紛



欽定四庫全書

集部

伊濱集卷九

七至

詳校官庶吉士

臣

初喬齡

侍讀臣孫球覆勘

謄錄監生臣黃鐘

謄錄監生臣嵇承屏



欽定四庫全書

伊濱集卷七

元 王沂 撰

七言律詩

次張雄飛王君寬倡和詩韻二首

繡衣光照錦城春  
肯忘吾家叱馭人  
別後有書傳白鴈  
夢中無路駕蒼麟  
江回艷潏波浮蜀  
山入函關樹拂秦  
何日東華聯轡語  
苦吟應怪鬢毛新

黑頭天陞共收科  
猶憶城南攬轡過  
十載低昂回羽翮

幾人存歿隔關河秋風畫扇情中斷曉鏡蛾眉妬更多  
聞說著書堆滿室長安不見起悲歌

和魏伯時韻二首

霜洗長空兔穎纖素娥青女曉粧嚴畫樓燕子年年別  
金鴨沈烟夜夜添鴈嶺宿雲低似葢龍岡秋草瘦於髯  
屬車未覺清塵遠却為登臨野興兼

羶車一字捲朱簾別館離宮禁籞嚴白海波聲秋後小  
赤城雲氣曉來添農疇已溢如京望萍實仍聞似蜜甜

身愧甘泉陪法從獨騎羸馬走山崦

和蘇伯修侍郎平村暮歸韻

長楊冠劍列仙曹咫尺清光未覺遙  
賜履初辭青瑣闥鳴珂又過赤闌橋  
紫駝負鼓移天仗蒼鶻翻鈴響碧霄  
莫道都人新禁火焚香夾道聽簫韶

和許參政寄懷吳宗師韻四首

蓬萊仙仗正徘徊扈蹕年年宰相來  
慣見龍沙連白海却吟紅藥與青苔  
雲扶豹尾班才上日轉螭頭講未回

準擬相逢又初度菊潭供釀待華開

遙望文星過上台長楊從獵未歸來名駒顧影窺丹鳳  
宮蕊飄香點綠苔賜酒滿浮金鑿落歌鬟低按紫雲回  
只今燕市求奇駿東閣懸知早晚開

看雲老子立徘徊黃鶴銜書雲上來曾約相車遊紫府  
何妨蠲屐破蒼苔仙花又向庭中落宮水還縈苑外回  
一讀新詩思清壯如將圖畫坐邊開

廣文華髮厭低徊驚見仙翁鶴馭來函谷關遙橫紫氣

草玄門靜踏蒼苔何時宣室承釐後更約浮邱把袂回  
塵世茫茫誰與問秋風琪樹又花開

秋興

龍岡高處望涼亭山勢東來拱帝京雖愧橐鞬嚴宿衛  
也將歌頌答昇平御溝風漾鮫綃軟宮瓦煙開翡翠明  
院吏熟眠花影轉日長鈴索靜無聲

銅雀觚稜倚九天非烟非霧滿山川天津析木星槎上  
五柞長楊禁籞連雲氣有時成翠幄野花無地著金蓮

詞臣擬上東封頌扈蹕從今億萬年

漠漠秋雲覆苑低九雛烏上女牆啼露從僊掌金莖白  
枝老珊瑚鐵網齊遙認車聲時輾轆莫令溝水自東西  
相如擬草長門賦勝費丹砂鑄裏蹄

壽宏毅和韻有酒筒花擔之句再和答之

賭酒金錢坐列曹風光南陌本非遙花香不隔歲蕤瑣  
柳色深藏宛轉橋駿馬有時嘶舊路游絲無力下晴霄  
天津偷得新翻曲肉味都忘不為韶

羽林弓騎亦分曹  
楊柳春旗一色遙  
風送落花低逐馬  
水隨芳草暗通橋  
鸞旗捧日回雙闕  
絳蠟分烟下九霄  
病眼自憐張太祝  
衡門孤坐聽簫韶

王善甫郎中見和鄙韻賦此答之  
兼簡夢得君冕二同年

昔別髭生今鬢蒼  
天風吹雁不成行  
山河政自驚存歿  
鳬鶴寧須較短長  
杯面晴光搖蟻綠  
華枝春意轉鸝黃  
相逢未久還相送  
和我新詩字字香

終南山色曉蒼蒼  
雞犬新豐自作行  
倦客獨憐春又過  
故人相見話偏長  
秦宮土在花摧碧  
蜀道梅時雨弄黃  
準擬重來一樽酒  
竹萌衣解蕨芽香

慶壽詩卷

封事當年滿皂囊  
歸來雙鬢點吳霜  
風塵丹轂多春夢  
籬落黃花自晚香  
醺酒尚能留好客  
擊鮮時復溷諸郎  
漢家靈壽誰堪杖  
早晚蒲輪召孔光

薛子敬母慶壽



貴及親闈古亦希  
況逢化日正舒遲  
老萊耀彩慙簪紱  
潘岳稱觴乏鼎彝  
大國進封鸞舞誥  
東朝寵錫蟻浮卮  
自憐懷橘終無日  
南望茫茫涕泗垂

壽胡琴所并酬春日見寄時寓居王宅

投老林泉賦考槃  
百年仍具漢衣冠  
宅邊五柳歸來種  
池上三槐借得看  
絕俗調高聞白雪  
結交契重見金蘭  
兒孫揔是登雲器  
袍笏堆床積漸寬

華髮森森四十三  
不才心事與誰談  
驚人詩句君先得

名世文章我亦貪  
雨歇溪流初泛綠  
雪消山色揔浮藍  
興來却憶新箋美  
昨暮過從飲未酣

和王繼學題瓊花圖二首

琪花瑶草本同科  
摹寫詩人費切磋  
楚客佩搖明月碎  
龍宮衣剪素綃多  
玉龜山接三清路  
烏鵲橋橫七夕河  
莫怪落英收不得  
雙環仙子夜來過

天上春風自一科  
瓊絲雪蘂巧如磋  
花神定品應無二  
月姊分香獨占多  
已落為雲歸閨苑  
初開剪水散銀河

喚回紅袖烏絲夢后土祠前幾度過

過鄱陽湖

東流浩浩遠朝宗  
聯絡坤維秀所鍾  
山入斷雲迴白雁  
波涵落日見蒼龍  
英雄埋沒憐今古  
形勢開張扼要衝  
回望匡廬招五老  
紫烟晴瀑界雲松

寄來峯長老

不見旻公又幾秋  
碧雲吟罷憶湯休  
夢回江上招提境  
書寄淮南賈客舟  
玉麈尾分獅子座  
曼陀花雨鷓鴣裘

當年曾悟身如幻準擬滄浪沒白鷗

送式上人還高麗

三韓東望渺雲烟野鶴飛歸不計年鼓枻海師能聽法  
獻珠龍女解參禪珊瑚樹礙浮杯渡蒼蘊香薰擁衲眠  
好把新詩書側理碧雲佳句要人傳

題山水圖

住近仙家雲錦溪結樓高與白雲齊丹崖翠壁參差見  
流水桃花咫尺迷道士養丹清似鶴山翁愛酒醉如泥

毫端寫出猶奇絕  
況復西風一杖藜

答清江劉仲脩

青春詞翰蚤蜚英  
白首林泉更負名  
好古獨懷韓吏部  
交懽曾枉范雲卿  
滄江逝水金川淨  
錦樹浮雲玉筍清  
遠憶瑤琴諧雅操  
敢辭擊節和新聲

送李西溪巡檢

作吏湖山亦自奇  
君行況及落紅飛  
公庭白日文書少  
野店青林笋蕨肥  
楊柳風翻沽酒旆  
桃花水漲釣魚磯

懸知賦得江南樂笑我緇塵染素衣

送朱生之湖州巡檢

楚客才高不奈秋得官歸近白蘋洲村醪可飲山園坐  
夜柝無聲月滿樓雲水歌傳青雀舫風塵夢斷黑貂裘  
鬢絲禪榻應憐我懶向湖亭覓舊遊

送巡檢湖州

著鞭跨馬欲風生絕勝窮年老一經鳴鏑應弦驚雁落  
傳杯刻燭賦詩成白蘋洲渚橫秋水畫舫笙歌奏月明

若過湖亭煩寄語三刀未夢雪添莖

送王巡檢

王郎巡檢赴官時江水江花映彩旗可但彎弓能落雁  
仍聞刻燭解題詩青烟古戍人畦菜白日公庭吏奕棋  
坐嘯使君端好士薦書應到鳳凰池

送謝仲連之小鹿巡檢

興言攜手過烏衣曾記風流玉雪姿綠鬢同驚今日雪  
錦囊各誦昔年詩芳塘草滿春回早古鎮峰多日下遲

莫把青衫試鳴鏑要憑征雁寄相思

飛來山

越絕山如龜曝背越王馬迹白雲中神鰻躍出杯吞海  
靈鷲飛來翠挿空島霧深迷龕影月松聲清和瑤鈴風  
前身玄度來何暮應悟三生一夢同

除夕示袁仲修

三年魚鳥笑人頑家在江南幾日還客裏惟君青眼舊  
醉中憐我綵衣閒詩成醵酒春燈裏歌斷梅花月影間



夢裏不知歸路遠朔風吹雪滿關山

虎牢關

雙崖突兀引羊腸仰望遙空足素長今古太行青歷歷  
乾坤元氣白茫茫英雄底用爭天險真宰那知關後防  
回首三分書裏事區區縛虎笑劉郎

和張孟功侍郎監海漕見寄詩

省眼星郎給一軺銀河路遠鵲成橋吳歌閩語來江島  
雨楫風帆趁海潮紫府夢回鳴玉佩珠宮吟罷寫水綃

只今歲運須劉晏宜有忠言答聖朝

和潘子素寄張伯雨詩

白雲何處是巖阿聞道松聲滿淨窩  
京洛風塵人老易江湖秋水雁來多  
田園蕪沒須微祿親友凋零半逝波  
欲問囊中食玉法相思夜半起悲歌

瑤草年年滿澗阿高人燕寢自名窩  
山中丹井龍歸晚雲上仙臚鶴占多  
瓦榼尚餘京口酒布帆無恙洞庭波  
掉頭巢父誰能得歸聽吳儂小海歌

送秦元之江南

漢家原廟重祠官五載春風玉筍班  
華表鶴歸曾有語鼎湖龍去渺難攀  
清名瑞世猶周鼎昭代思賢定楚環  
莫道江鄉鱸可膾仙人合住道家山

次仲弟子啟僉憲過洞庭湖

黃鶴樓前曙色開呂公磯上首重回  
平湖盡處青天出積雨晴時白鴈來  
千古戰爭餘舊壘百年歌舞廢崇臺  
昔人總逐流波逝猶想清風被八垓

晨興聞賜妃入廣次心吾

遠傳天上降宮花重拜丹墀踏御沙  
憚看鴻飛思故國嬌羞馬上問誰家  
珊瑚作枕分龍席錦繡堆床壓象牙  
適意相知南北異帛書休寄雁行斜

寄題王子穀望親樓樓與牛山相對

宜溪孝子重彝倫高起書樓遍望親  
馬鬣早時封若斧牛山長日淚沾巾  
梁間歸燕時尋主簾底飛雲每傍人  
料得北平新紀事應同家乘勒堅珉

題劉南山翁五世畫像贊

鶴駕羣仙未易招偶因圖像見清標  
渾源山水猶神秀喬木風霜自寂寥  
六世衣冠歸盛族百年文物記前朝  
石田惆悵蒼苔滿西望長吟不自聊

題周伯溫玉雪波

千樹梅花照眼明主人詩思與同清  
雲裁野服侵寒著玉種高田帶雪耕  
柿葉滿窓書已遍松肪浮甕釀初成  
扁舟莫動山陰興宣室承釐待賈生

送麥敬存檢正湖廣省

黃鶴磯頭春水生蒼龍闕下送君行才因朱墨紛然見  
詩到江山勝處成蘭省分僚官獨重玉堂伴直夢同清  
瀟湘無數回飛鴈採得蘋華寄別情

寄王顏隱士

南園分首記當年東郡文星遠避躔機事祇生鷗閣下  
徵書不到鹿門邊中園歲取禾三百美酒時煩斗十千  
倘憶幽禽能喚客還家留取杖頭錢

和古愚留別韻

細柳南薰拂錦韉  
路人爭看玉堂仙  
詩書將揖紅旗下  
歌吹生陳絳帳前  
沽酒何須分祿米  
揮毫莫惜費吟箋  
夢回無奈漁陽慘  
猶勝青門聽杜鵑

滎陽道中

橫帶鴻溝底用爭  
只今春草為誰生  
一邱貉了當年事  
千載槐留後世名  
牛口谷前逢急雨  
虎牢關上看新晴  
成名孺子何勞嘆  
笑殺窮途阮步兵

七曲文昌祠

夾道松陰護石苔  
龍盤七曲上崔嵬  
初無瑤席椒漿奠  
空望靈旗鶴駕來  
樓殿參差雲雨上  
江山環合畫圖開  
紅綾餅餌當年事  
四十人中愧不才

草堂

浣花老翁不可見  
浣花草堂何處尋  
鷓鴣曬翅錦江岸  
鸚鵡將雛檜樹陰  
數畝林塘誰是主  
千年韶濩有遺音  
一盃重酌郢筒酒  
鼓竹蕭蕭風動襟



題子午谷孤秀軒

手種孤松不記年，終南山色兩蒼然。  
虬枝曉滴研硃露，翠蓋春葳種玉田。  
膏化龜蛇蟠厚地，聲疑笙鶴過羣仙。  
陰崖茅屋誰能到，落實應留待偃佺。

題滑臺宋壽卿侍御西亭

侍御高懷與世違，秋空惟見一鴻飛。  
山銜落日浮佳氣，亭遶青松長舊圍。  
鑒國舊傳多讜論，卜居從此脫塵鞿。  
回瞻太白橫秦嶺，猶記澄清攬轡歸。

題裴公亭

古木蒼藤翠作圍，裴公亭上立斜暉。  
波沉海底珠宮見，雲起峰頭鶴馭歸。  
明滅時看金鯉出，徘徊閒送白鷗飛。  
欲携九節仙人杖，直上天壇一振衣。

送陳玉

官柳飛花滿薊門，河橋猶有繫舡痕。  
美人欲別重攜手，春水方生易斷魂。  
虎豹天關雲自隔，鷄豚鄉社席還溫。  
虞卿莫厭窮愁在，著就新書細與論。

賜履欣聞出尚方歸來雙鬢點吳霜趨朝長樂鐘聲晚  
猶夢名藩燕寢香八座輝光聯紫極千年遺愛在甘棠  
蘇臺明月清如許直送鳴珂入未央

送張蔚

先生紵袍入賢關名動綺襦紈袴間羣空冀北目先過  
草長江南人未還冰鱗斫鱸醒午醉紫筍烹茶消晝閒  
扁舟安得落吾手卧看茗溪溪上山

送張楨

黃龍關塞雪漫漫馬上貂裘不受寒  
豈謂紬書隨太史  
翻令索米困長安  
舟移彭蠡秋波白  
樹隱匡廬夕照殘  
歸弔當年鄭公業  
旅墳三尺草先乾

送董仲潛

大明殿上早朝時  
奏對聲聞白玉墀  
鵷鷺班行爭動色  
雲霄勲業蚤相期  
燕鴻夜月回清影  
郢樹春風發故枝  
明月扁舟瞻魏闕  
五雲樓觀鬱參差

送鍾起元

龍岡南去接榆關挾策逢君幾往還作賦風沙鞍馬上  
橫經紈袴綺襦間彩毫曾點宮池水白苧時看輦路山  
笑我清狂解吳語鑑湖未乞鬢先斑

送梁受之

宦遊南北馬牛風燈火停雲偶爾同升斗可能留隱吏  
山川終要著詩翁呼盧竟識袁彥道飲酒還逢陳孟公  
早晚朝廷聘遺逸蒲輪應到大關東

送孫伯起

畫省含香近上台西江千里聘奇才山川雄控龍沙濶  
機務遙分鳳沼開帳幕時隨春草動孤貂偏耐雪花來  
只愁誤作潯陽夢醉聽琵琶句易裁

送陳鑒之

尚鑒乘傳過龍沙新賜貂裘雪花白鼻騮驕肥首宿  
青檀帳小響琵琶長安賣藥誰能識梁苑延賓禮更加  
別後相思一回首五雲深處是京華

送虞愷之

花時寂寂掩衡門，恰在花飛又送君。  
病眼輕來猶斷酒，故人別後少論文。  
江波處處明於草，世態年年薄似雲。  
寄語青城老樵客，藥成金鼎幾時分。

送劉子節

馬生詞賦賈生年，三語風流到處傳。  
朝路衣冠裁鑑密，慶門酥酪弟兄賢。  
江頭酒醒梅花外，天上書回鴈影前。  
寄謝邦君惟坐嘯，芙蓉幙府玉堂仙。

平陽驛留題

市烟官樹鬱蒼蒼駐馬城邊望太行楊柳杏花春已半  
遊絲芳草日初長山圍晉館千峰翠水灌汾田百畝黃  
無柰風沙西去路羅衫銷盡舊熏香

題漢州驛

錦水東來遠故城江干樓閣倚新晴鵝黃怕醉郢筒酒  
犀角欣嘗巴竹萌可惜海棠經雨盡空看槿樹拂雲生  
薛濤風月無人繼誰唱陽關第一聲

拜朱文公祠



武夷不見此心勞得拜遺祠  
解鬱陶喬木春風思未已  
泰山晴雪仰猶高扶衰民極同先聖  
刮垢陳編到楚騷  
往事浮雲千變盡不妨江漢日滔滔

汾陰

春寒猶戀紫貂裘楊柳青青古渡頭  
詞客重來應白髮  
好山依舊枕寒流禹門波淨龍吟夜  
汾水烟消鴈影秋  
駐馬回看自多感更須橫笛起高樓

發寶雞

重關複棧厭崢嶸喜見川原掌樣平  
猿嘯回看鬼迷店馬嘶遙指鳳翔城  
隋宮漢館依稀見渭水秦山遠近迎  
却是春衣濕梅雨南薰古道怕塵生

巴東秋風亭

汾陰祠罷濟樓船豈謂雄才悔暮年  
半夜神光飛后土明朝寶鼎薦甘泉  
山河氣壯中原勢簫鼓聲沉蔓草烟  
今日秋風亭上望白雲猶是漢時天

欽定四庫全書

伊濱集卷八

元 王沂 撰

七言律詩

過彭澤縣

靖節休官跡已陳  
水光山色為誰新  
九江屬邑名千載  
東晉高風祗一人  
石上孤松猶翠黛  
宅前五柳自青春  
南來欲致生芻奠  
憑借當時漉酒巾

送鄭子安經歷之浙西憲司

遊觀東吳天下稀賓筵憲府更光輝  
西湖秋泛芙蓉水北闕霜迎獬豸威  
山際驛樓紅半吐烟中官樹翠相圍  
使君旌節應西下目斷巴江鷁首飛

寄許大參

夢中曾上庾公樓楚岫縱橫翠欲流  
別後武昌魚可食重來溫室樹經秋  
因君樂聖銜杯句憶我垂綸載月舟  
無奈龍沙霜露早綈袍欲著重回頭

去年風雨菊花時曾誦灤京百首詩  
今日六龍隨警蹕

却憑征鴈寄相思長吟明月同千里欲對芳尊把一卮  
別意短長何所似湘波不盡碧參差

寄題曹新淦赤壁圖

誰向臨臯夢鶴飛畫圖風物尚依稀清霜木落黃泥坂  
斷岸波迴赤壁磯故壘銷沉遺戰盡孤舟縹緲弄簫微  
高懷最憶金川守千古希賢思不違

遊元虛庵留題

詰屈人間不用悲馭風騎氣欲何之遠求勾漏空千里

甘隱吳門自一奇  
白鶴歸來人換世  
青山老盡客題詩  
支頤忘讀參同契  
貪看楊花落硯池

臨江驛

嘉陵江色淨於酒  
嘉陵官船輕似鴻  
水禽羣飛夕照外  
晴嶂落影亂流中  
棹歌不解巴童語  
甌飯欣看蜀客風  
喚馬夜投山驛迴  
隔林遙映一燈紅

鞏縣道中用文野送別韻

秣馬芝田日又遒  
扶鞍弔古且遲留  
殘陵衰草寒雲際

故壘斜陽野水頭千古徒爭兩蝸角百年能費幾狐裘  
道旁翁仲應相問又是邛山第幾秋

木齋為方積賦

昔年種樹未勝巢老榦如今屋脊高屢許狙公分橡栗  
時招木客醉香醪衣巾白日驚蒼雪枕簟西風夢海濤  
歲晚淹留吾倦矣借君叢桂續離騷

贈采詩熊思齊還清江

清江故舊久相違聞說尋詩款竹扉阻對高軒維白馬

謾從空谷賦緇衣日暄官路梅花早霜熟郵亭木葉稀  
最惜揚舡不相送臨風極目思依依

百丈山賦贈廖自強之清江

清江風景似桃源百丈山深隔縣門峯引碧蘿垂艸閣  
水深蒼峽到書園舊時節士何人在近代詩家幾輩存  
文學只今懷檄去登臨猶得及春溫

槍竿嶺紫菊

山僧贈我叢叢菊紫蓋光涵翡翠明青女何妨妬顏色



徐娘元自有風情  
龍沙秋意晴  
偏好鴈嶺寒香晚更清  
回首故園人在否  
花前樽酒共誰傾

七月十三日書感

去年學語囀春鶯  
早解回頭鷹  
喚名豈謂女生為寄物  
翻悲吾老未忘情  
丹砂猶記新塗顚  
文葆空憐舊繫綢  
今日龍沙千里濶  
秋風吹淚欲霑纓

霍山道中

太行高讓霍為隣  
祀典褒崇輔嶽神  
桂醕香銷疑化雨

靈旗風動不驚塵  
丹崖翠壁層層路  
野杏山桃處處春  
華髮詞臣無補報  
停鞭回望祝堯人

題陳則虛散木軒

萬彙林林造化中  
始知才與不才同  
青黃肯效犧尊用  
長養還均雨露功  
點易研硃枝滴露  
談元揮麈座生風  
客來欲問南華旨  
閒倚枯根目送鴻

送姍弟劉子彥應辟

畫舫衝雨發官河  
束帛徵賢是禮羅  
天上午門新日月

海中春水淨風波經筵進講先三禮名世登庸重四科  
自昔珠林推俊秀茂才應制蚤鳴珂

嘉陵道中

路轉嘉陵入渺茫巴童蕩漿棹歌長山雞傍驛如泥賤  
竹飈登盤覺笋香石棧苔紋烟借紫江干梅子雨催黃  
空愁夜宿瑯瑤驛無柰鈴聲斷客腸

華陽宮

方壺別館墮何年下視孤雲一握天旋斲黃精供野飯

相連青竹引山泉詩中我愛陶元亮林下誰逢葛稚川  
鶴駕不來明月老小窻無地著風煙

謝司明復贈東坡帽

故人贈我東坡帽因帽思人亦我師只恐隣翁偷學樣  
還憐稚女道相宜養丹未用顏如玉耽酒何妨鬢似絲  
為報西風莫吹落尊前留戴菊花枝

題馬伯庸賦劉氏溪山圖

道人昔作朱門客溪上春風草自芳藂桂曾聞招隱士

塵纓準擬濯滄浪  
蘆洲繫艇鳬鴉墨  
石壁題詩苔蘚蒼  
誰遣漁人解橫笛  
夢中疑是在山陽

華隱者圖

貳令陳君舉善為鵬舉而作余與子  
高自立二公留止山房同推隱者之

意而賦  
詩焉

原上春風語鵲鷓  
溪南新結得華亭  
堆床書卷聞鐘起  
破的詩歌按節聽  
幽澗自多流水操  
好山長送入簾青  
知君已熟淮王趣  
招隱何人敢扣扃

送高道崇歸仙巖宮

青鞋偶爾犯塵紅夢寐仙巖翠拂空賀監風流真可慕  
長康癡絕不妨同摩挲金狄千年後洒埽漁磯一笑中  
後會叅同較同異定煩騎鶴過神嵩

發長安留別王善甫尹文質諸公

未到長安一解顏故人連日費追攀相看寒食清明裏  
況復周臺漢苑間長樂花香濃勝酒灞陵樹色巧遮山  
獨嫌清渭無情極照我塵埃鬢欲斑

題張尚書復修姑蘇驛詩卷和子翬韻

樓舫載酒太湖秋  
曾向寒蕪弔舊邱  
圖畫如今傳勝事  
江山依舊記清游  
館娃宮壤香消逕  
鬪鴨闌空水滿洲  
聞道徵黃飛詔下  
都將遺愛付吳謳

送烏希說編修之會稽降香

仙掖朝回響玉珂  
使星光照鏡湖波  
看君獻頌傳金馬  
記我臨書換白鵞  
風送蓬萊潮信早  
烟消天姥月明多  
相逢賀監如相問  
擬向滄波理釣蓑

書事

坐看槐庭日影移頭原如舊鬢先絲十年不調已過半  
萬古垂名何所為得俸只充沽酒用賣文邨辦買山資  
傳聞官長催供課下馬時措病眼眊

和樂邨書觸目

澹澹春雲弄晚晴桃花竹外數枝明垂楊卧雨欲無賴  
幽鳥呼人如有情塵事膠膠遊興懶流年冉冉客心驚  
簡書縛我原來急不是歸田計未成

送丑時中之西臺照磨



故人別我入秦川，開幕遙臨玉井蓮。  
恩賜猩袍如昨日，歸騎驄馬看他年。  
路經函谷山多雨，春盡新豐草自烟。  
相見勾稽閒北榻，尺書時到廣文壇。

送宋翼御西臺照磨寄丑時中管勾

送子函關西復西，青門柳老惜分攜。  
雲深魏闕人回望，路熟秦川馬自嘶。  
攬轡定酬他日志，拂塵閒看去年題。  
芙蓉幕下如相問，擬向秋風釣故溪。

輓胡汲仲先生

少日嚴徐召漢庭暮年孤節魯山清頽波砥柱文章古  
滄海浮雲富貴輕兜率空歸天上夢少微端惜世間名  
眇然人物知誰在淚洒西風慟老成

先生英氣欲橫秋投老青山映白頭幾見詩書曾發塚  
誰知涇渭自分流詞源衮衮無遺恨天網恢恢不見收  
江漢遺書今好在雲間無復謫仙樓

題史左丞小車行春圖

左丞林壑魯西郊  
矗矗新亭自結茅  
几畔有書都可用

世間無客不求交，小車春晝游麟藪。  
脩竹秋天養鳳巢，我老只今多白髮。  
願携琴酒過塘坳。

為劉子高賦

少日東南事壯遊，憑高弔古思悠悠。  
山中樓觀神仙府，江上雲霞帝子州。  
別塢松風琴入奏，平湖花雨棹聞謳。  
只今投跡山房裏，坐看新圖歎白頭。

為楊子立賦

秋華亭上雨初晴，山入溪南箇箇清。  
筇竹客來松逕杳。

蹇驢人度石橋平  
當筵俠氣龍騰劍  
把酒清歌鶴載笙  
共羨君家好賓客  
畫圖詩句總高情

和呂仲實過故宅

射麋山下草先秋  
畫戟朱門一夢休  
故榭西風思駿裏  
壞牆陰雨蔓牽牛  
曾聞為將無三世  
謾說承恩只五侯  
古往今來多少事  
夕陽不盡水東流

書李敬叔別蒲城詩卷二首

十載承明把一麾  
急流勇退脫塵羈  
蓴鱸亦預知機事

松菊能忘歸隱期  
伊闕風煙應好在  
壺頭勲業竟何為  
漢庭屢詔求遺逸  
從此彈冠亦未遲

紫髯如戟氣如虹  
肯使微官負此公  
一笑偶逢山水國  
論文誰信馬牛風  
相期要出功名外  
得意還留道義中  
朱轂風塵何足顧  
不妨留眼送飛鴻

題傅汝礪上省掾凌伴明詩卷

少年英氣鶚橫秋  
魯佐軺車作遠遊  
丹徼烟嵐明漢節  
彩毫珠玉散蠻州  
省郎待士能高誼  
才子論心肯暗投

燕市黃金買奇駿未容歸倚仲宣樓

題伊魯布哈贈行詩卷

銅章笑解出龍泉老雅歌謠一口傳可但鬻衣爭刻石  
仍聞遮道願留鞭何蕃素得諸公譽陳寔終居四長先  
昭代掄材重循吏聲華從此到星躔

題趙家墓碑

雙碑義立趙家墳不似靈光獨偶存承露盤空仙墮淚  
繫牲石在字堪捫桑田滄海餘喬木文采風流到遠孫

見說家庭有餘地好隨春雨種蘭蓀

題栖霞山卷

何年李白去騎鯨流水漂香路杳冥自種紫芝分藥圃  
閒乘白鹿看仙經石床花露朝來掃茅屋松風夜半聽  
老我京華塵土裏苦吟應笑鬢星星

用吳閒閒韻題解辰公詩卷

洲橫白鷺似金陵卓犖才名舉國稱滄海千年來野鶴  
玉壺一段貯清水泮宮芹藻同誰賦快閣風烟與客登

望見香城山似筆他時諸子看飛騰

題張孝子詩卷

武衛張生膽滿軀千重鐵騎視如無論功合上碧油幕  
破的爭傳金僕姑大漠窮沙歸戰馬高臺落日下馴烏  
人生忠孝能如此不愧山西大丈夫

江閣秋風為表弟曾性道賦

江上青山閣下鷗白雲飛去水悠悠長蘆落鴈來千里  
枯木寒鴉度幾秋曾見鏐飛餘古塔猶聞鐘響出高湍



晴天縹緲涼如洗閒把魚竿踏釣舟

元日雪

端門瑞霧曉氤氲片片天花落錦茵萬蓋鳴珂翔鶴氅  
九重傳鑰報鷄人靈和柳色迷金縷太液波光縹緲塵  
待詔東方窮欲死還隨草木見陽春

弔胡招故隱

西風凜凜洒塵寰千古幽光不可攀往事空尋管寧傳  
故居誰弔陸渾山高情能致巢由上大節終全漢魏間

一盞寒泉薦秋菊悠悠心送白雲閒

送馬編修南康州判

萱草叢叢手自移留花不發待郎歸書成東觀藏金匱  
舡過西江著綵衣酒釀鶯兒香稻熟鱸飛蟬翼白魚肥  
懸知佐郡多餘暇一笑承歡樂未違

過金閣山

金閣遙看縹緲居空香何處度飈車曾逢野鹿銜丹訣  
定叱山祇守素書白海波翻虹飲後青林風急雨飛初

羣龍應解仙翁意要採新詩作步虛

送濟南張太監奉祠歷山

張侯奉幣傳天語乘傳祝釐虞帝祠從此百神聯職地  
一如比屋可封時國人先賦緇衣句太史還書封禪詞  
始信馨香在明德豐年協氣滿靈旗

送廬州推官孟景章

吏隱無如古合肥畫舫南下疾鴻飛風烟入興詩成易  
魚稻常登訟自稀錯節會看逢利器軺車應為布霜威

兒寬古義人知少見說新書待子歸

和劉助教見示詩韻

龍岡五月曉生寒喜見書窗日影團  
小草自憐承雨露野鷗何事逐鷓鴣  
愛閒僧祔常多病投老揚雄強作官  
禪榻茶烟時一笑免教街吏報平安

古寺秋日梨花

簷蔔林中縞袂鮮西風吹夢賣錫天  
倚欄翠袖霜欺薄照水冰姿月妬妍  
魔女自知花作供徐娘猶解玉為鈿

粉香零落蒼苔滿日暮驚回野衲禪

七夕宿雲山寺

三年埋沒簿書塵暫借禪房養病身  
貪夢尊鱸歸故國不知牛女會天津  
蛛絲綴果空傳巧犢鼻懸竿未是貧  
讀罷楞嚴萬緣靜西軒月色為誰新

追輓烈婦謝夫人

金華婺宿儲貞烈浙右于今有幾人  
化石宛同星墮地投厓因見海揚塵  
姓名久著鄉邦重文字相傳簡帙新

永念不移悲令子悼亡有感悟安仁

陸渾早行有感

歸心搖蕩若懸旌幾度欲歸歸不成地偏未堪長袖舞  
愁多空和短歌行沙頭春漲半篙綠竹外梅花數點明  
夢裏陸渾山下路何人知我此時情

寄李時中

津亭官樹葉黃時把酒缸頭話別離待詔依然窮索米  
還家何事悔看棋空憐鬢髮驚秋早豈有文章結主知

書到淮南又搖落定將佳句慰相思

寄蘇昌齡

別後瓊華幾度芳花前顧曲憶周郎竹西載酒金錢盡  
江上懷人碧草長給札期君賦雲夢解纓容我濯滄浪  
相思莫道無來使佇看飛鴻拂建章

寄馬伯庸

法星光裏見文星知向東南攬轡行十道使車瞻斧鉞  
六朝詞客樹降旌長干浪靜魚龍息北固霜飛草樹明

千里相思難命駕夢隨潮到石頭城

和薛翰林韻寄洛下諸公

綠陰門巷鳥聲中却掃無人過敬通洛下笑談山遶座  
江南消息水連空舊遊如夢了無迹病客觀心漸有功  
欲向伊川買修竹風流他日與君同

送劉遂初修撰覲省

烏鵲橋竿送喜頻西風衰柳潞河津朱雲况肯留東閣  
汲黯何曾歎積薪國史新修多直筆朝衣暫脫見閒身



懸知別後登高處醉撚黃華憶故人

登姥山二首

路轉巔崖虎鼻峰上方日晏始聞鐘晴嵐密護岩西竹  
香霧輕浮澗底松山果欲凋還共采林僧久別乍相逢  
玩竒行徧燒丹處拾得仙人九節筇

武婆山上白雲層每欲追遊祇未能昨日偶同子弟往  
幾時重與故人登借騎道士朝天鶴問訊仙姑駕海鵬  
共醉中山千日酒頭巾倒挂樹西藤

出河南省考試院呈夷門故人

園棘重開字落鴉霜袍鵠立靜無譁城頭又見千年鶴  
海上空歸八月槎貪訪舊交多白髮不知故隱正黃花  
相逢可惜歡娛地不置清尊但煮茶

送舒嚕萬戶鎮雲南

故人分閫鎮滇池不獨威名草木知南詔酋豪親俎豆  
西州父老識旌旂清猿夜永聞常慣丹鳳雲深望轉疑  
若過劔門關下驛拂塵尋我舊題詩

試院東顏仲偉胡居敬陳心吾解開先高允憲

諸公

薇垣試藝棘圍開  
叅相求賢體聖裁  
班入禮門催下鑠  
令傳兵衛擬銜枚  
龍光貫斗星潛動  
海氣連城雨欲來  
螽測管窺思報稱  
喜聞多士待掄材

題胡氏栢友亭

君家種栢長龍鱗  
歲晚相看似故人  
每愛棟梁才獨古  
亦憐金石韻長新  
窗前芳草春來好  
門外高車客過頻

安得雲松高百尺結巢歸隱願為隣

汧陽縣

汧陽縣門僅容馳汧陽縣廳垂綠莎春歸蜀道海棠盡  
地近隴山鸚鵡多飲澗居氓羞汝瘳負鹽遊子和秦歌  
回看天際來時路萬疊嵐光海湧波

幽居同劉韶賦

春泥門巷雨聲多潤浹荒畦露淺莎石砌落梅疎影竹  
鑑池流水細通河坐深還愛青氍舊老至其如白髮何

海內太平寧有象詩成聊復醉時歌

倚氏道中

道經倚氏望中條秀色浮空海上潮中有幽人甘隱遯  
每令行客想風標柴門石徑依然在松蓋雲旗不可招

老我山林負真趣東風吹鬢影蕭蕭

寄李伯強同年

銅駝陌上入秋風醉把黃花意未窮塵土十年雙鬢禿  
闕河千里一尊同恨君不識孔文舉笑我欲從張長公

別後相思隔伊水石樓明月鴈聲中